

Na bida di 1917 pa 1977

Compositor y Musico Arubano Rufo Wever pionero di Musica y Cultura Arubano

Co-compositor Aruba Dushi Tera

ORANJESTAD (AAN): En connecion cu nos dia nacional nos ta recorda cu na aña 1952 Rufo Wever hunto cu su gran amigo musico y compositor Padu Lampe a compone e himno nacional na Aruba.

E tempo ey e idea a nase como no ta tin un cantica na Papiamentu cu por a usa durante aubadenan y otro dianan importante pa Aruba. Tabata tin un cantica na Hulandes cu tabata worde usa hopi, cu tabata un vertaling un di cancion existente di Hulanda y cu palabranana adapta pa Aruba.

Asina a nase e cantica Aruba Dushi Tera cu despues a worde declara himno di Aruba.

MINI-BIOGRAFIA: Aki ta sigui un minibiografia di e compositor Rufo Wever.

Dia ocho di December 1917, Rufo a nace na Wilhelminastraat 33, Oranjestad, Aruba, e primogenito di e matrimonio di Shon Leonila Maria Annette Lampe Babijn y Civiles Marcial Wever Everts.

E pareha tabata bin di famianan acomoda y Civiles tabata un contratista, constructor di edificacionan, di barconan y ebanista. Don Civiles tabata tin un mente technico pero tambe tabata gusta musica y tabata toca clarinet y cuarta.

Net prome cu Rufo a cumpli 6 aña, Rufo a haya un simfonia di boca regalo y den un par di dia el a sorprende su famia cu e por a toca un cantica cu tabata na moda su mes y sin ningun ayudo. Rufo su tata a keda masha impresionado y entusiasma y mesora a compra un piano y a contrata e conocido maestra di musica di



Curaçao, Shon Shishi Rodriguez Timmer pa Rufo. Sra. Rodriguez a cuminsa sifia Rufo e conocimentonan di musica en general. Manera cu Rufo a haya e piano e mes tabata practica ariba dje.

Tempo cu Rufo ta tin apenas 10 aña su tata a fallece arrepentinamente y a laga Rufo y su tres otro rumannan huerfano. Su mama Shon Annette, un dama di karakter fuerte y semper cu un conducta correcto a sigui e lucha pa hiba su famia padilanti. Aki el a haya e sosten financiero di su famia.

Tempo cu Rufo ta tin 12 aña ya e por a toca piano na un manera admirable. Tambe el a sinja su mes saxofon, guitarra, cuarta, clarinet y otro instrumentonan ritmico.

Tempo cu Rufo ta tin 15 aña el a lanta e orkesta musical "Melody



Band" hunto cu su amigonan : Tom Lampe (violin) , Wewe Croes (violin), Boysie Lampe (violin) , Twai Croes (trompet), Clemente Lacle (drum), y Rufo na piano. Despues tambe a join e grupo Padu Lampe, primo segundo di Rufo, y aki a cuminsa nan amistad.

Nan 1935, inspira door di e famoso compositor y cantante Argentino Carlos Gardel cu a bishita Aruba e aña ei, y cu Rufo a haya un oportunidad pa actua hunto cu ne, Rufo a lanta su grupo di tango " Los Trovadores Tropicales" hunto cu su amigonan Clemente Lacle (cantante)

y guitaristanan : Harold Hopmans, Carlos Booi, Jan Croes y Shemmi Coronel. E conjunto aki tabata e prome conjunto musical di Aruba cu a toca na un radio na Curaçao, radio Curom.

INICIO COMO COMPOSITOR: Aña 1935 tabata un aña di hopi significacion pa historia musical, Rufo a compone na edad di 18 aña, su prome wals "Arubanita" y e composicion aki a cuminsa e era di composicionnan Arubano moderno. E composicion aki a bira asina conoci y gusta cu te awe despues di 67 aña di su composicion e ta sigui ta un di e composicionnan mas

toca den historia musical di Aruba. el a worde toca y graba pa un variedad di artistanan y cu hopi frecuencia por tende na radio y televishon. E tabata e prome wals, Arubano y Antiyano, cu un miembro di Cas Real, Reina Juliana, a balia riba dje.

E composicion di "Arubanita" tin su significacion historico y cultural pa Aruba, pasobra e ta e prome composicion cu su autor ta conoci y cu te ainda ta worde graba y toca.

Despues di su prome composicion a sigui un sin fin di composicionnan refina y cu un sabor

Sigui lesa Pg. 21

Continuacion pagina 20



pikante. Entre otro e famoso wals di tres parti "Encantadora", su segundo wals, e wals complejo "Annette" den tres parti dedica na su mama. E wals "Aruba", bunita y elegante e ta representa e gran dignidad di e pueblo di Aruba. E wals "Antillenhuys" el a dedica na e minister Arubano y su gran amigo Wim F.M. Lampe. Rufo su amor pa su isla ta obvio ora ripara cuanto biaha el a usa e nomber Aruba : wals

"Arubanita, wals "Aruba", himno" Aruba dushi Tera ", tumba "Aruba tiera bunita", "mambo di Aruba", wals "Mi Aruba Stima". Tambe tabatin algun composicion cu su gran amigo y colega Padu Lampe : E tumba "Chanita" cu letra di Hubert Booi, e inmortal calypso "Carnaval" di aña 1954 cu a bira famoso cu e cantante Edwin Zichem y naturalmente e himno nacional di Aruba "Aruba Dushi

Tera" composita na 1952 y graba pa prome bes den version di orkesta na Venezuela pa e orkesta di Don Anibal Abreu.

UN DON MUSICAL: Compone tabata facil pa Rufo y a sigui un total di mas of menos 400 composicion. Di esaki mas of menos 100 ta composicionnan completo pa piano of orkesta y 300 ta composicionnan y areglo pa cahi orgel.

Hopi di e composicionnan pa cahi orgel Rufo a usa e number artistico A.N. Tillano.

Rufo su composicionnan ta inclui : wals, tumba, bolero, zamba, mambo, porro, merengue, danza, mazurka, polka y calypso. Tambe ta di importancia pa menciona cu ademas di compositor, Rufo tabata arreglista y tur e arreglonan e tabata haci su mes.

Semper Rufo tabatin un of otro melodia den su cabez, pesey tabata worde exigí di e muchanan di famia pa no haci ningun ruido, pasobra esaki por causa ca Rufo ta perde e melodia di e composicion cu e tabata bezig cu ne.

Den un entrevista sostene cu Rufo na 1968 ariba e pregunta cu di tur su composicionnan cual ta su favorito, e contesta tabata rapido : e wals "Encantadora"! Na edad di 21 aña Rufo a cuminsa cu e trabao di cahi orgel. Aruba conoce awe mas of menos 106 aña di musica di cahi orgel, pero Rufo tabata e prome persona cu a cuminsa traha e cilindernan pa e cahi orgel na Aruba y el a haci esaki pa 33 aña. Anteriormente e cilindernan tabata bay Curaçao. E hecho aki tambe ta duna Rufo Wever un lugar

especial den historia di musica folklorico di Aruba.

Na 1941 den un accidente fatal Rufo a perde su braza robez, apear di e tragedia aki den su bida el a supera esaki y el a keda compone y toca piano cu un braza artificial cu e mes a diseña y cu a worde traha pe na Alemania.

Dia 30 di December 1977, apear cu Rufo su salud a bay atras, toch el a fayece inespera di un pulmonia.

Aruba y Antiyas a perde un di su musiconan di mas grandi, e pionero di e musica y cultura moderno di Aruba.

COMPOSICIONNAN: Aki ta sigui un lista di algun di e composicionnan :

Wals: Arubanita, Encantadora, Llorando, Mis Penas, Padu Del Caribe, Glenda y Herbert, Flamingo Room, Aruba, Pensando en Ti, Emelina, Dulce, Pensamiento, Preciosa, Bonita, Palomita, Biba pascu, Violeta, Trupial, Chuchubi, Solo solo,

Bandolero, Antillenhuys, Annette, El libertador, Suavidad, Belinda

Tumba: Paranderos, Awa blauw, Tienda nobo, Den steef, Bam zoya, Compa Nanzi, Sucu dushi, Giambo bieu, Ta m'a bula e waya, Ring ring, Coba poz, Mi oloshi, Mes ora, Pan Cayente, Aruba tiera bunita, Tumba pa gozar, Sabrosita, Calientito, Bitter bay, Pikitin pikitin

Bolero Te quiero, Algun dia sere feliz, Gracias amigo.

Zamba: Boom, boom, boom.

Mambo: Mambo de Aruba.

Porro: Marinero.

Merengue: Nenita bonita, Merengue popular, Wega bala, Galiña, Me gusta mas, Pura candela.

Mazurka: Revuelta, Alegria, Curacao.

Polka: Fiesta, Gasta Dek, Gozando.

Calypso: Carnaval (cu Padu Lampe), Pimienta.

Danza: Danza Alegre.